

Anugerah keusahawanan IPT tawar hadiah lumayan

SERDANG 10 April - Kementerian Pengajian Tinggi akan menganjurkan pertandingan anugerah keusahawanan, khusus untuk institusi pengajian tinggi (IPT) tempatan mulai tahun ini.

Menterinya, Datuk Seri Mohamed Khaled Nordin berkata, IPT yang muncul johan kategori keseluruhan akan membawa pulang hadiah wang tunai sebanyak RM150,000.

Beliau menjelaskan, setiap pemenang bagi lima kategori lain, masing-masing bakal menerima hadiah wang tunai berjumlah RM50,000.

"Hanya syarikat yang dibuka oleh penuntut IPT boleh mengambil bahagian. Kementerian Pengajian Tinggi akan membuka penyertaan hujung tahun ini, kita umum bila tiba masanya.

"Penganjuran pertandingan tersebut menunjukkan kerajaan be-

nar-benar serius dalam usaha menggalakkan IPT memberi tumpuan terhadap aspek pembangunan usahawan dalam kalangan penuntut mereka," katanya.

Beliau berkata demikian pada sidang akhbar selepas merasmikan program Inkubasi Usahawantani 2012 di Dewan Pertanian, Fakulti Pertanian, Universiti Putra Malaysia (UPM), di sini hari ini.

Hadir sama, Ketua Setiausaha Kementerian Pengajian Tinggi, Datuk Ab. Rahim Md. Noor dan Naib Canselor UPM, Datuk Ir. Dr. Radin Umar Radin Sohadi.

Sementara itu, Mohamed Khaled meminta kesemua IPT di negara ini menerapkan elemen keusahawanan dalam setiap jurusan yang ditawarkan kepada para penuntut mereka.

Menurutnya, langkah tersebut bertujuan memberi pendedahan

awal kepada penuntut IPT agar mereka lebih berminat untuk menjadikan bidang keusahawanan sebagai kerjaya pilihan.

Menurutnya, program keusahawanan anjuran IPT tersebut hendaklah melatih penuntut supaya mampu berdikari dan tidak terlalu mengharapkan pekerjaan dalam sektor awam atau swasta setelah menamatkan pengajian kelak.

"Graduan-graduan IPT yang bergelar usahawan itu bukan sahaja mampu mencipta kerjaya untuk diri sendiri, malah, mereka juga akan membuka peluang pekerjaan kepada orang lain," ujarnya.

Kata Mohamed Khaled, selain program anjuran IPT, para penuntut juga digalakkan menyertai aktiviti koperasi dan keusahawanan sosial bagi meningkatkan kemahiran mereka.



MOHAMED Khaled Nordin (depan, empat dari kiri) beramah mesra dengan sebahagian usahawantani muda di U